

晦庵先生朱文公文集

晦庵先生朱文公文集卷第一

詞

虞帝廟迎送神樂歌詞

桂林郡虞帝廟迎送神樂歌者新安朱熹之所作也熹既
爲太守張侯拭紀其新宮之績又作此歌以遺桂人使聲
于廟庭侑牲璧焉其詞曰皇胡爲兮山之幽翳長薄兮俯
清流渺冀州兮何有眷茲土兮淹留皇之仁兮如在予我
民兮不窮以愛沛皇澤兮橫流暢威靈兮無外絜尊兮肥
俎九歌兮招舞嗟莫報兮皇之祐皇欲下兮儼相羊烈風
雷兮暮雨

右迎神三章二章四句一章五句

虞之陽兮離之辭皇降集兮巫屢舞桂酒湛兮瑤觴皇之

歸兮何許龍駕兮天門羽旄兮繽紛俯故宮兮一慨越宇
宙兮無隣無隣兮奈何七政協兮羣生嘉信玄功兮不宰
猶彷彿兮山阿

右送神三章章四句

賦

白鹿洞賦

白鹿洞賦者洞主晦翁之所作也翁既復作書院洞中又
賦其事以示學者其詞曰

承后皇之嘉惠宅廬阜之南畝閔原田之告病惕農扈之
非良粵冬孟之既望夙余駕乎山之塘徑北原以東驚陟
李氏之崇岡

地名李
家山

揆厥號之所繇得頽址於榛荒曰昔

山人之隱處至今永久而流芳

陳舜俞廬山記云唐李渤
字濬之與兄涉偕隱白鹿

洞後為江州刺史乃即洞創臺榭自昇元之有土始變塾

而為庠儼衣冠與弦誦紛濟濟而洋洋廬山記又云南唐昇元中因洞建學

館置田以給諸生學者大集乃以國子監九經李善道為洞主掌其教授江南野史亦云當時謂之白鹿國庠在

叔季而且然矧休明之景運皇穆穆以當天一軌文而來

混念敦篤於化原乃搜剔乎遺遜盼黃卷以置郵廣青衿

之疑問樂菁莪之長育拔雋髦而登進謹按國朝會要太平興國二年知江

州周述乞以九經賜白鹿洞詔從其請仍驛送之六追繼

照於咸平又增修而罔倦廬山記又云咸平五年敕重脩又聖十哲之象旋錫

冕以華其歸琛亦肯堂而詒孫郭祥正書院記云祥符初直史館孫冕以疾辭于朝

願得白鹿洞以歸老詔從之冕未及歸而卒皇祐五年其子比部郎中琛即學之故址為屋榜曰書堂俾子弟居而

學焉四方之士張茂草於熙寧尚茲今其奚論廬山記熙寧中作已

來者亦給其食夫既梓余以堂壇友又訂余以冊書尋訪之初得茂草矣樵者指告其

處客楊方子直遂贊興作之謀既謂此前脩之逸迹復開而劉清之子澄亦襄集故實來寄

我聖之宏撫亦既震于余衷乃謀度而咨諏尹悉心以綱

紀吏竭蹶而奔趨士釋經而敦事工殫巧而獻圖曾日月

之幾何屹厦屋之渠渠事具呂祖謙伯恭所作書院記山葱瓏而遠舍水

汨瀟而循除諒昔人之樂此羗異世而同符偉章甫之我

我抱遺經而來集豈顯眺聽之爲娛實觀宮墻之可入愧

余脩之不敏何子望之能給知道體之亡窮又豈一言而

可緝請姑誦其昔聞庶有開於時習曰明誠其兩進抑敬

義其偕立允莘摯之所懷謹巷顏之攸執彼青紫之勢榮

亦何心乎俛拾亂曰澗水觸石鏘鳴璆兮山木萃萼枝相

樛兮彼藏以脩息且游兮德隆業茂聖澤流兮往者弗及

余心憂兮來者有繼我將焉求兮

感春賦

觸世塗之幽險兮攬余轡其安之慨埋輪而繫馬兮指故
山以爲期仰皇鑒之昭明兮眷余衷其猶未替抑重巽於
旣申兮徇耕野之初志自余之旣還歸兮畢藏英而發春
潛林廬以靜處兮聞蓬戶其無人披塵編以三復兮悟往
哲之明訓嗒掩卷以忘言兮納遐情於方寸朝吾疑履而
歌商兮夕又賡之以清琴夫何千載之遙遙兮乃獨有會
於余心忽嚶鳴其悅豫兮仰庭柯之葱蒨悼芳月之旣徂
兮思美人而不見彼美人之脩嫿兮超獨處乎明光結丹
霞以爲綬兮佩明月而爲璫悵佳辰之不可再兮懷德音
之不可忘樂吾之樂兮誠不可以終極憂子之憂兮孰知
吾心之永傷

空同賦

何孟秋之玄夜兮心慘矣而弗怡偃予軀之既寧兮神杳
杳兮寒闥雲屋掩而弗扃兮壁帶耿而夜光宕予魄而不
得視兮悵竚立其怔營靈脩顧予而一笑兮懽並坐之從
容寐將分而不忍兮旦欲往而焉從眷予衷之廓落兮奄
愁結而增忡超吾升彼崑崙兮路脩遠而焉窮忽憑危以
臨睨兮歲廣寒與閔平風信真際之明融兮又何必懷此
夢也矢予詞以自寫兮盍將反予旆乎空同

琴操

招隱操

淮南小山作招隱極道山中窮苦之狀以風切
遁世之士使無遐心其肯深矣其後左太沖陸

士衡相繼有作雖極清麗顧乃自爲隱遁之辭
遂與本題不合故王康琚作詩以反之雖正左
陸之誤而所述乃老氏之言又非小山本意也
十月十六夜許進之挾琴過予書堂夜久月明
風露淒冷揮絃度曲聲甚悲壯旣乃更爲招隱
之操而曰穀城老人嘗欲爲予依永作辭而未
就也予感其言因爲推本小山遺意戲作一闕
又爲一闕以反之口授進之併請穀城七者及
諸名勝相與共賦之以備山中異時故事云

疑當作
老人

南山之幽桂樹之稠枝相樛高拂千崖素秋下臨深谷之
寒流王孫何處攀援久淹留 聞說山中虎豹晝鳴聞說

山中熊羆夜咆叢薄深林鹿呦呦獼猴與君居山鬼伴君
遊君獨胡爲自聊歲云莫矣將焉求思君不見我心徒離
憂

右招隱

南山之中桂樹秋風雲冥濛下有寒栖老翁木食澗飲迷
春冬此間此樂優游渺何窮我愛陽林春葩晝紅我愛
陰崖寒泉夜淙竹栢含煙悄青葱徐行發清商安坐撫枯
桐不問簞瓢屢空但抱明月甘長終人間雖樂此心與誰
同

右反招隱

詩

遠游篇

舉坐且停酒聽我歌遠游遠游何所至咫尺視九州九州
何茫茫環海以爲壘上有孤鳳翔下有神駒驤孰能不憚
遠爲我游其方爲子奉尊酒擊鉢歌慨慷送子臨大路寒
日爲無光悲風來遠壑執手空徊徨問子何所之行矣戒
關梁世路百險艱出門始憂傷東征憂暘谷西遊畏羊腸
南轅犯瘴毒北駕風裂裳願子馳堅車躡險摧其剛戔戔
旣不支瑣瑣誰能當朝登南極道暮宿臨太行睥睨即萬
里超忽凌八荒無爲蹙蹙者終日守空堂

擬古八首

離離原上樹戢戢澗中蒲娟娟東家子鬱鬱方幽居濯濯
明月姿靡靡朝華敷昔爲春蘭芳今爲秋薜蘿寸心未銷
歇託體思同車

綺閣百餘尺朝霞冠其端飛欄麗遠漢曲楹何盤桓清謠
發徽音一唱再三歎借問誰爲此佳人本邯鄲微響激流
風浮雲慘將寒爲言何所悲遊子在河關不恨久離闕但
憂芳歲闌願爲清霄夢燕昵窮餘歡

上山採薇蔽側徑多幽蘭采之不盈握欲寄道里艱沈憂
念故人長夜何漫漫芳馨坐銷歇徘徊以悲嘆

佳人朗秋夜蟋蟀鳴空堂大火西北流河漢未渠央野草
不復滋白露結爲霜梁燕起高飛雲鴈亦南翔念我同心
子音形阻一方不念執手歡隔我如參商寓龍不爲澤晝
餅難充賜金石徒自堅虛名真可傷

鬱鬱澗底樹楊英秋草前與君結歡愛自比金石堅金石
終不渝懽愛終不踈一夕遠離別悠悠在中途相思未云

變音容定何如傷彼三春渠灼灼層華數盛時不可留恐
逐嚴霜枯夫君來何晚賤妾長離居

高樓一何高俯瞰窮山河秋風一夕至憔悴已復多寒暑
遞推遷歲月如頽波離騷感遲暮惜誓閔蹉跎放意極驩
虞咄此可奈何邯鄲多名姬素豔凌朝華妖歌掩齊右緩
舞傾陽阿徘徊起梁塵絳綵紛衣羅麗服秉奇芬顧我長
咨嗟願生喬木陰寅緣若絲蘿

夫君滄海至贈我一篋珠誰言君行近南北萬里餘結作
同心花綴在紅羅襦雙垂合歡帶麗服眷微軀爲君一起
舞君情定何如

衆星何歷歷嚴霄麗中天殷憂在之子起步荒庭前出門
今幾時書札何由宣沉吟不能釋愁結當誰憐臨風一長

嘆淚落如奔泉

題謝少卿藥園二首

自此詩至卷終先生手編謂之牧齋淨藁

謝公種藥地窈窕青山阿
青山固不群花藥亦婆娑
一掇召冲氣三掇散沈疴
先生澹無事端居味天和
老木百年姿對立方嗟哦
持此供日夕不樂復如何

小儒忝師訓迷謬失其方
一爲狂瘖病望道空茫茫
頗聞東山園芝朮緣高岡
瘖癡百不治效在一探囊
再拜藥園翁何以起膏肓

齊一本作醒

邵武道中

同前詩起辛未

風色戒寒候歲事已遑遑
勞生尚行役遊子能不悲
林壑無餘秀野草不復滋
禾黍經秋成收歛已空畦
田翁喜歲豐婦子亦嘻嘻
而我獨何成悠悠長路岐
凌霧即曉衰落

日命晚炊不惜容鬢凋鎮日長空飢征鴻在雲天浮萍在
青池微蹤政如此三嘆復何爲

友人黃子衡欲之上庠以詩留行

若士有奇操久厭山林卑奮衣千里道已與親友辭子行
何悠悠世路方如茲歸來亦何日車馬光陸離幽蘭生前
林擢置白玉墀不以芳意遠結根終不移顛子崇明德潛
躍貴因時悲風靜夜聽喬木歲寒姿何以廻軒駕千載相
與期

奉酬丘子野表兄飲酒之句

微褐不充體寒夜懷重衾古來窮廬士歲暮多苦心苦心
亦何爲世路多崎嶇不藉盃中物離憂坐自侵舉杯當勿
辭何爲復沉吟醺酣遺所拘神慮弊遐襟荒酒思前戒歡

謹發清音雅唱一何高仰酬非所任申章聊叙報洪量亦
余欽

丘子野表兄郊園五詠

欲識淵明家離離疎柳下中有白雲人良非遜世者

柳

結援遂芳植覆牆擁深翠還當具春酒與客花下醉

荼蘼

移自溪上園種此牆陰路牆陰少人行來歲障幽戶

竹

芭蕉植秋檻勿云憔悴姿與君障夏日羽扇寧復持

芭蕉

花柳遶宅茂先生在郊居下帷良已苦時作帶經勸

蔬圃

古意

兔絲附樸櫟佳木生高岡弱蔓失所依佳木徒蒼蒼兩美
不同根高下永相望相望無窮期相思諒徒爲同車在夢
想忽覺淚沾衣不恨歲月邁但惜芳華安嚴霜萎百草坐

恐及茲時盛年無再至已矣不復疑

送劉旬甫之池陽省覲六十四丈遂如行在所上計

雨雪成歲暮之子遠徂征酌酒起相送慨我別離情池陽
實大藩佐車屈時英子行一請覲上計趨吳京良玉懷貞
操芳蘭含遠馨臨岐一珍重即此萬里程

晨起對雨二首

淒冽歲云晏雨雪集晨朝高眠適方起四望但蕭條遠氛
白漫漫風至林靄消流潦冒荒塗清川亦迢迢遐瞻思莫
窮端居心自超覽物思無託即事且逍遙

晨起候前障白煙眇林端雨意方未已后土何時乾倚竹
聽蕭瑟俯澗聞驚湍景物豈不佳所嗟歲已闌守道無物

役安時且盤桓翳然陶茲理貧悴非所歎

殘臘

殘臘生春序愁霖逼歲昏小紅敷艷萼衆綠被陳根陰壑
泉方注原田水欲渾農家向東作百事集柴門

客舍聽雨

壬申

沈沈蒼山郭暮景含餘清春靄起林際滿空寒雨生投瘞
卽虛館簷響通夕鳴遙想山齋夜蕭蕭木葉聲

宿武夷觀妙堂二首

陰靄除已盡山深夜還冷獨卧一齋空不眠思耿耿閑來
生道心妄遣慕真境稽首仰高靈塵緣誓當屏
清晨叩高殿緩步遶虛廊齋心啓真秘焚香散十方出門
戀仙境仰首雲峰蒼躊躇野水際須將塵慮忘